

TEACHERS

Tun sorkarah zirtirtu 1,507 lak thar a ni a, an zinga mi 526 chuan an hna an zawm lo niin School Education department hotute'n an sawi.

Zirtirtu hi sorkar sikul atan 1,188 lak thar a ni a, Samagra School-ah 319 lak thar a ni bawk a. Zirtirtu lakte hi Primary school zirtirtu 461, Middle School zirtirtu 348, High School zirtirtu 457 leh Higher secondary school zirtirtu 241 te an ni. Hna zawm ta lote aiawhtu tur hian Middle School leh High School-ah panel list atanga hnawh khah zel a ni a. Primary School hian Panel an neih loh avangin zirtirtu 234 lak that tum mek a ni, an ti a. Hetih lai hian kum 2024 chhung khan zirtirtu pension 20 leh thi 158 an awm a ni.

Mizoram chhunga High School awm zawng zawngah Zirtirtu 4,134 leh naupang 37,815 an awm a ni.



BELGIAN SCRIBE

March ni 6 a Lengpui tumhmuna kartut ruak 2 a kawl avanga man, Belgian chanchinbumi Simon Clement chuan a thubuai chinfel thuai a nih a beisei thu a sawi.

Tuna bail a chhuak mek Simon Clement chuan a thubuai chu court-in rang taka a ngaihtuah a, a chhuah zalen thuai a beisei thu Akashvani Aizawl a hrilh a. A thubuai khawihthu leh chhuitu Police lamin charge sheet an thehluh thuai a beisei thu a sawi. Simon hi March ni 19 khan Aizawl district chief judicial magistrate (CJM) chuan bail in a chhuah a. Bail-a a chhuah hian cheng sing nga chu court-ah bail bond atan thehlutin court phalna lo chuan Mizoram chhuahsan khap a ni a, court-ah a khat tawka a inlan bakah Police-in an mamawh chuan an koh hun apianga inlan tura tih a ni. Simon-a dinsaktu ukil Pu Reuben L. Tochwawng chuan naktuk Thawhtanni (April ni 8)-ah emaw hian a thubuai chhuitu Police officer hian court-ah charge sheet a thehluh theih an beisei thu a sawi a. A thubuai hi chinfel thuai an beisei thu a sawi bawk.

Simon Clement hi chanchinbu tana thlalatu (photo journalist) a ni a. Myanmar atanga a lokir hnu-ah Lengpui tumhmunah a zin bag a kartut ruak pahnih hmuh a nih avanga man a nih thu Police chuan an sawi a. Sairang Police station-ah Foreigners' Act, leh Arms Act, (1-B) hmanga thubuai siamsak a ni.

Hemi hma, nikum July ni 19 khan Lengpui tumhmunah bawk hian UK khua-leh-tui Daniel Newey chu a zin bag a silaimu hmuhchhuah a nih avangin man a lo ni tawh a. Daniel Newey hi Myanmar rama Chin hel pawlte ralthuam hman han zirtir a puh a ni bawk a. A chungthu hi ngaihtuah a nih hnu-ah kumin February thla laihawl khan CJM court chuan thiam chantirin a chhuah a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni. Zanin dar 6 leh a chanve-ah Chanchinthar puan leh a ni ang.



CAMPAIGN ON NARCOTICS

Nimin khan Excise & Narcotics Department leh Sub. Hqrs YMA, Saitual District tangkawp chuan ruihhlo do chungchangah inkhawm an buatsaih He hunah hian, Saitual District Excise & Narcotics O/C Pu R. Lalruatlana, Station, chuan Saitual District chhunga ruihhlo kaihnawihin a hrin chhuah rukruk te a hluar hle tih sawiin, ruihhlo do kawngah hmalak a tul hle a ni, a tia, ruihhlo do kawnga khawtlang hruaituten thahnemngai taka hma an laknate chu fakawm a tih thu leh thawhhona tha tak an neih zel a beisei thu sawiin, tun hi a bul tanna a ni a ti a, tha thlah loa theih tawp chhuah zel an tum thu a sawi a, ruihhlo ngaite pawh uluk taka zirtirna te ngaihthla a, hlawkna chhar ngei turin a sawm a ni.

SRS Chairman,Pu C. Lalremruata pawhin thu sawiin ruihhlo ngaite chu pui turin an inhawng reng tih a sawi a, harsatna an tawhte chu inthlahrung loa hriattir zel turin a chah a ni. SRS inpawh tlang taka hun hmanho a duh thu sawiin, ruihhlo bawih ata tal chhuak thei turin puih an inhuam reng a ni, a ti.

Ruihhlo do beihpui thlakna-ah hian Saitual District chhunga ruihhlo ngaite koh khawm an ni a, ruihhlo-ina taksa a tihchhiat dan te, khawtlang nun a nghawng dan te leh ruihhlo kaihhnawih dan leh hrai pawimawh tak tak te zirtirna hun hman a ni a, ruihhlo ti lo tura intiamna neih nghal a ni.



WORKERS WELFARE

Mizoram Building & Other Construction Workers Welfare Board (MBOCWWB) hnuaiah nikum chhung khan mi 6,489 an inziaklut.

Labour, Employment, Skill Development & Entrepreneurship (LESDE) hotute'n an sawi danin MBOCWWB hnuaia inziaklut zingah hnathawhna-ah boral an awmin cheng nuai thuma ral thin an ni a. Kum 2019-2023 chhung khan zangnadawmna hi mi pakhatat Rs. 50,000/- pek thin an ni a, a vaiin cheng nuai 4 leh sing 5 pek chhuah a ni. Nikum October ni 7a board thukhawm chuan board hnuaia inziaklutte hamthatna dawn theihte siamtha in zangnadawmna (Disability benefit) pawh Rs. 50,000/- atangin cheng nuai khatah a tipung a. Ramtuileilote tana hamthatna mai piah lamah hian heng ramtuileilova awmte hi Disability pension (thlatin Rs. 1,000/-) an damchhung pek an ni bawk. Kum 2019-2023 chhung khan kuthnathawk inziaklut zingah ramtuilei lo mi 9 an awm a ni.

